

Prózdnińska zaběra digitalnje

Zwonka šulskeho časa džěcom nowe medije spřistupnjeja

Malešecy (MiR/SN). W Malešanskim džěćacym dnjowym přebywanišću „Wódny muž“ su džěći w přěnim prózdniskim tydženju dwaj dnjej digitalnje po puću. „Zmóžnjamy svojim chowancam poskitki zwonka wšědneho dnja“, rjekny nawodnica pěstowarnje Borbora Kralowa. „Zo so z digitalnym swětom zaběramy, pak je přěni raz.“ Džěći zeznaja na tableće

hrajnu app wo wohnjowej woborje. Zdobom wužiwaja BOOKii-knihu z wotpowědnym wobsahom a BOOKii-pisak. Byrnjež app w němčinje předležała, je poskitk serbski. Wšako so w app njerěči. Hortowe džěći pisaja skript za sluchohru a ju z pomocu BOOKii-pisaka resp. šmóratka nahrawaja.

W Chróšćanskej Jednoće wjerći so tři

dny dolho wšitko wokoło robotica a codinga. Poskitk dr. Andreja Měrcinka měri so na wšitkich zajimcow. Wón wjedže mjez druhim krok po kroku k tomu, wutworić zwiski mjez jednotliwymi strukturnymi projektami. Wšako džěla- tej LUCIJA w nošerstwje Serbskeho šulskeho towarstwa a Serbski eksperimINT Campus w nošerstwje Radworskeje staršiskeje iniciatiwy w tymle wobłuku hromadže. Chowancy tamnišeho horta so w přěnim prózdniskim tydženju tohorunja z nowymi medijemi zaběraja.

Tež w druhim prózdniskim tydženju póndže wo digitalny swět. W Smjerdžěćanskim kubłanskim srjedžišću LIPA w nošerstwje SŠT wotměwaja medijowy camp. Hač produkcija trikowego filma, zaběra z wuknjenskimi aplikacijemi abo geocaching – hižo nětko su wobdžělnicy wćipni, kak sobudžělačerjej LUCIJE džěcom wot sydom do džesać lět nowe medije spřistupnitaj.